



Inatsisartunut ilaasortaq
Aqqaluaq B. Egede
Inuit Ataqtigiit

Tunngaviusumik Inatsisissaq pillugu Isumalioqatigiissitaq pillugu §-37 naapertorlugu apeqqummut 2019-348-mut akissut

Brevdato: 3-12-2019
Sags nr.2019-25175
Akt id. 12219025

Apeqqutinut kingulianiittunut akissutit matumuuna nassiunneqarput.

P. O. Box 1037
3900 Nuuk
Tel. (+299) 34 50 00
Fax (+299) 34 63 50
E-mail: oed@nanoq.gl
www.naalakkersuisut.gl

1 pillugu. Ilaasortat akissarsiaannut tunniussinissamut periarfissat allangortinneqarnissaat siunertaralugu Tunngaviusumik Inatsisissaq pillugu Isumalioqatigiissitamut suliakkiutip allannguutaata akuerineqarnissaanut Naalakkersuisut aalajangerneranni suna tunngavigineqarpa?

Apeqqutigineqartumut tunngavilersuutigineqartumi takuneqarsinnaasutut aallarniutigalugu erseqqissaatigissavara suliami matumani Naalakkersuisut aalajangiinissamut tunngavigisaat Naalakkersuisut aalajangiinerisa kingorna Tunngaviusumik Inatsisissamut Isumalioqatigiissitaq pillugu Ataatsimiititaliamut nassiunneqarmat. Ataatsimiititaliaq taanna aamma Inuit Ataqtigiinnit marlunnik ilaasortaataaffigineqartoq tunngaviusumik inatsisissamik suliaqarnermut atatillugu pissutsit susassaqarfigineqartut pillugit ingerlaavartumik paasissutissiiffigineqartarpoq.

Aamma Tunngaviusumik Inatsisissaq pillugu Isumalioqatigiissitamut suliaassat annertussusiat nammagassiinerallu pissutigalugit Tunngaviusumik Inatsisissaq pillugu Isumalioqatigiissitamut suliakkiutip allangortinneqarnissaa pillugu Tunngaviusumik Inatsisissaq pillugu Isumalioqatigiissitap siulittaasoqarfianit qinnuteqaammik Aningaasaqarnermut Nunanilu Avannarlerni Suleqatigiinnermut Naalakkersuisoq ulloq 25. oktober 2019-imi tigusaqarnera Naalakkersuisut suliami iliuusaanni tunngavigineqarpoq. Taamaalilluni siulittaasoqarfiup Siumumit, Inuit Ataqtigiinnit Demokraatinillu ilaasortaataqarfiusup isumalioqatigiissitamut ilaasortat aningaasarsiaqartitsinermut inatsimmi maannamut § 18, imm. 1 kisiat tunngaviginagu aammali § 18, imm. 1-imit 2-mut naapertorlugit aningaasarsiaasa amerlineqarnissaat kissaatigaa.

Apeqqut Aningaasaqarnermut Naalakkersuisumit Naalakkersuisunut saqqummiunneqarpoq, Naalakkersuisullu suliakkiutip oqaatigineqartutut annertusineqarnissaanut ulloq 14. november 2019-imi piginnaatitsissummik akuersipput.

Tassunga aamma atatillugu isumalioqatigiissitap sulinerani piffissaq sivitsorneqarpoq.

2.a pillugu. Taamaaliortoqarsimappat suut tunngavilersuutaasimappat?

Tunngaviusumik Inatsisissaq pillugu Isumalioqatigiissitap siulittaasoqarfiata Aningaasaqarnermut Nunanilu Avannarlerni Suleqatigiinnermut Naalackersuisumut ulloq 25. oktober 2019-imi allagai innersuussutigineqarput, tamatumani suliat nammagassiinerat pissutigalugu ilaasortanut aningaasarsiaritit allanngortinneqarnissaannut periarfissiisumik suliakkiutip allanngortinneqarnissaa isumalioqatigiissitap qinnutigalugu.

2.b pillugu. Isumalioqatigiissitap aningaasarsiassat pillugit qinnuteqaataa isertuussaava?

Naamik, taanna ilanngussatut ilanngunneqarpoq.

3 pillugu. Tunngaviusumik Inatsisissaq pillugu Isumalioqatigiissitami qinikkat qiningaanertik tunngavingalugu ilaasortaasut akissarsersorneqarnissaat Tunngaviusumik Inatsisissaq pillugu Isumalioqatigiissitami ilaasortanit tamanit isumaqatigiissutigineqarpa?

Qinnuteqaammik ilanngussatut ilanngunneqartumi takuneqarsinnaasut Tunngaviusumik Inatsisissaq pillugu Isumalioqatigiissitap isumaqatigiittup suliakkiutip allanngortinneqarnissaa pillugu qinnuteqaammik nassiussinissamut siulittaasoqarfik piginnaatippaa.

Inussiarnersumik inuulluaqqusillunga


Vittus Qujaukitsoq



Nuuk, 25.10. 2019

J.nr.: 02.91.06

Sulliss.: JLO

Aningaasaqarnermut Nunanilu Avannarlerni
Suleqatigiinnermut Naalakkersuisoq
Vittus Qujaukitsoq
P.O. Box 1037. 3900 Nuuk

Asasara Vittus,

Inatsisit tunngaviusussat pillugit Isumalioqatigiissitanut, maannakkullu sulilereersunut atugassarititaasut eqqar-saatigalugit suliakkiissummi aalajangersarneqarsimavoq isumalioqatigiissitanut ilaasortat Inatsisartunut ilaasor-taasut isumalioqatigiissitami sulinerminnut aningaasarsiaqartinneqassanngitsut. Isumalioqatigiissitamut ilaa-sortat qitiusumik allaffeqarfimmi kommuniniluunniit atorfilittaasut tassani sulinermut aningaasarsiaqartinne-qaratik sulisitsisuminnilli nalinginnaasumik aningaasarsiaqartinneqassapput. Ilaasortat Inatsisartunut ilaasor-taanatillu qitiusumik allaffeqarfimmi kommunimiluunniit atorfeqanngitsut aningaasarsiaqartitaanermut inat-simmi § 18, imm. 1-imi aalajangersakkat malillugit aningaasarsiaqartinneqassapput. Tamatumani ilaasortaq siulittaasoqarfimmut ilaasortaagaluarpat ilaasortaanngikkaluarpalluunniit aningaasarsiaritinneqartut assigiimmik amerlassuseqartinneqassallutik. Aammattaaq aalajangersarneqarsimavoq Isumalioqatigiissitami Siulittaasoqarfik immikkut aningaasarsiaqartinneqassanngitsut.

Ilisimatitsissutigisinnaavara ilaasortanut atugassarititaasut qulaani allaaserineqartut isumalioqatigiissitanit tamar-miusunit arlaleriarluni oqallisigineqartarsimmata, kingullermik isumalioqatigiissitat 29. august 2019 aamma ataatsimiinneranni. Ataatsimiinnermi tassani isumalioqatigiissitat tamarmiusut Siulittaasoqarfik piginnaatippaat apeqqut pineqartoq Naalakkersuisunut qaqeqqinneqassasoq, pitsaanerumik aaqeeqqusinissaq anguniaqqu-neqarluni.

Isumalioqatigiissitat tamarmiusut sinnerlugit taamaammat Siulittaasoqarfiup matumuuna qinnutigissavaat isumalioqatigiissitanut suliakkiissutissatut najoqqutassiaq Naalakkersuisunit allanngortinniarneqassasoq, taamaa-liornikkut aningaasarsiaqartitaanermut inatsimmi § 18, imm. 1-imi aalajangersarneqarsimasut avataatigut ilaasortanut aningaasarsiaqartitsilersinnaaneq aqqutissiuunneqarsinnaaqqullugu. Taamatut aqqiisinnaaneq ukununga tunngatinneqassaaq: isumalioqatigiissitat siulittaasuannut, siulittaasup tullianut, siulittaasoqarfimmi ilaasortamut, kiisalu isumalioqatigiissitat toqqagaattut suleqatigiissitat pilersinneqarsimasut siulittaasuinut pingasuusunut. Tassunga uiggiullugu ilisimatitsissutigisinnaavara isumalioqatigiissitat suleqatigiissitanik pinga-sunik pilersitsisimmata, suleqatigiissitani taakkunani pingaarnermik Kalaallit Nunaanni tunngaviusumik inatsisissap siunnersuusiorfigineqarnissaanik suliassaq pingaarnertut suliakkiutigineqarluni. Allatut oqaatigalugu; inatsisit tunngaviusussat oqaasertassaat aalajangersagartassaallu suleqatigiissitani taakkunani maannakkut aallunneqaleruttorpoq, suleqatigiissitanullu piumasaaqaataavoq isumalioqatigiissitanut tamarmiusunut suliap ingerlarnga pillugu nalunaaruteqartarnissaq isummerfissanillu suliaqartarnissaq. Isumalioqatigiissitat ukiumut ikinnerpaamik sisamariarlutik ileqquusumik ataatsimiittarput, suleqatigiissitat aammalu Isumalioqatigiissitat Siulittaasoqarfiat ataatsimiinnerit taakku akornisigut suliassaq annertusiartuinnavissoq akisussaaffigalugit. Oqaatigineqassaaq taamatut suliaqarneq, inatsisit tunngaviusussanut missiliuutip siulliup, aappaata kiisalu pingajuata naammassiartuarnera ilutigalugu aamma sakkortusiartussammat ilaasortaniillu annertusiartuin-

nartumik piunasaqarfiulissamat. Ilanngulluguttaaq innuttaasunik qanimut peqataatitsinissaq isiginiarneqar-tussaavoq, tassami missiliuutit siulliit naammassineqariarpata aamma sinerissami tusarniaanerit annertuut ingerlanneqalertussaapput. Tamanna suliaqarfiutit isiginiarneqarluinnarpoq.

Suleqatigiissitat pilersinneqareersut tassaapput:

- Naalackersuisaaseq pillugu suleqatigiissitat, siulittaasoralugu Per Rosing-Petersen.
- Pisinnaatitaaffiit pisussaaffiillu pillugit suleqatigiissitat, siulittaasoralugu Anita Hoffer.
- Nunanut allanut sillimaniarnermullu tunngasut pillugit suleqatigiissitat, siulittaasoralugu Aleqa Ham-mond.

Inatsisit tunngaviusussat pillugit Isumalioqatigiissitat 23. september 2019 Naalackersuisut immikkut ilaasor-taatitassaar toqqarneqareernerisa kingorna maanna tamakkersimalerput, tassaallutik: Siulittaasoq Doris J. Jensen (Siumut), siulittaasup tullia Kuupik V. Kleist (IA) , ilaasortat: Nivi Olsen (Demokraatit), Per Rosing-Petersen (Partii Naleraq), Aleqa Hammond (Nunatta Qitornai), Panínguaq M. Kruse (Atassut), Anita Hoffer (Suleqatigiissitsisut) kiisalu immikkut ilaasortatit; direktør Daniel Thorleifsen, adjunkt Rosannguaq Rossen, aallartitaqarfimmi pisortaq Mininnguaq Kleist, aallartitaqarfimmi pisortaq Lida Skifte Lennert kiisalu lektor, cand.jur. Skúli Magnusson (Islandermioq).

Sulinerup ingerlanerani piffissap suliaqarfiusup sivitsorneqaratarsinnaanerani apequt eqqarsaatigalugu, Siulittaasoqarfimmit naggaterpiaatigut 2020-imut aningaasanut inatsisissatut siunnersuummi; konto pingaarneq 20.01.13-imi: "Inatsisinut tunngaviusussanut isumalioqatigiissitaq aamma allattoqarfik-mut" tunngatillugu oqaasertaliunneqartut makku eqqaamaqqussavagut:

"Suliasat allattorsimaffiat allannortitaq 22. marts 2019-imeersoq malillugu aammalu isumalioqatigiissitami 1. maj 2019-imi aatsaat sulilermat taamaalillunilu isumalioqatigiissitap suliaqarnera kinguaattoormat sulinerup ingerlanerani piffissap suliaqarfiusup sivitsorneqarnissaanik pisariaqartitsilissappat tamatumunnga atatillugu isumalioqatigiissitap qinnuteqarsinnaanera pinngitsoorneqarsinnaanngilaq. Sivitsuineq Naalackersuisunit akueri-neqassaaq."

Inussiarnersumik inuulluaqqusillunga



Doris J. Jensen

Siulittaasoq

INUIT ATAQATIGIIT

Inatsisartuni



20. 11.2019

Inatsisartut Suleriaasianni § 37 imm. 1 naapertorlugu Naalakkersuisunut apeqqut imaattoq matumuuna saqqummiuppara.

Naalakkersuisunut apeqqut:

1. Naalakkersuisut ataatsimiinnerannit imaqarniliami ulloq 14. November naalakkersuisut imannak aalajangerput: *“ Kalaallit Nunaanni Tunngaviusumik Inatsisissaq pillugu Isumalioqatigiissitamut suliakkiutip allanngortinneqarnissaata akuerinissaanut Aningaasaqarnermut Nunanilu Avannarlerni suleqatigiinnermut Naalakkersuisoq piginnaatinneqassasoq, taamaalilluni Kalaallit Nunaanni Tunngaviusumik Inatsisissaq pillugu Isumalioqatigiissitami siulittaasoq ilaasortallu sinneri aningaasarsiaqartitsinermut inatsimmi § 18, imm. 1-2 naapertorlugu akissarsiaqartinneqarlutik, aamma taamaaliornikkut isumalioqatigiissitap sulineranut piffissaq ulloq 1. januar 2022 sivitsorneqarluni, aamma 2020-mut aningaasanut inatsisissatut siunnersuutip pingajussaaneerineqarnissaanut oqaasertaliussaq ilanngussaq 2-mi ilanngunneqartoq malillugu allannguutissatut siunnersuummik nassiussisoqassasoq, taamaalilluni aningaasarsiaqartitsinermut inatsimmi § 18, imm. 2-mi aalajangersagaq Inatsisartunut ilaasortanut Kalaallit Nunaanni Tunngaviusumik Inatsisissaq pillugu Isumalioqatigiissitamut toqqarneqartunut atorineqarsinnaaqqullugu, aamma Isummernissamat tunngavissiami oqaatigineqartutut siuliani allassimasut tunngavigalugit ulloq 1. januar 2020-mit atuutilersumik isumalioqatigiissitami ilaasortat siunissami akissarsiaqartinneqarnissaat Naalakkersuisunit akuerineqassasoq, aamma isummernissamat tunngavissiap matuma assinga Inatsisartuni Tunngaviusumik Inatsisissamat Isumalioqatigiissitaq pillugu Ataatsimiititaliamut kiisalu Kalaallit Nunaanni Tunngaviusumik Inatsisissaq pillugu Isumalioqatigiissitamut nassiunneqassasoq.”* Tamanna aalajangerneq sumit tunngaveqarpa?
2. Tunngaviusumik Inatsisissaq pillugu Isumalioqatigiissitap ilaasortaanit ilaasortat qinikkat akissarsiaqarlutik sulinissaat qinnutigineqarsimava?
 - a. Taamaaliortoqarsimappat suut tunngavilersuutaasimappat?
 - b. Isumalioqatigiissitap aningaasarsiasat pillugit qinnuteqaataa isertuussaava?

3. Tunngaviusumik Inatsisissaq pillugu Isumalioqatigiissitami qinikkat qiningaanertik tunngavingalugu ilaasortaasut akissarsersorneqarnissaat Tunngaviusumik Inatsisissaq pillugu Isumalioqatigiissitami ilaasortanit tamanit isumaqatigiissutigineqarpa?

(Inatsisartuni ilaasortaq Aqqaluaq B. Egede Egede , Inuit Ataqtigiit)

Tunngavilersuut:

Tunngaviusumik Inatsisissaq pillugu Isumalioqatigiissitap ilaasortat qiningaanermikkut Isumalioqatigiissitamut ilaasortaasut akissaasersorneqannginnissaat Inuit Ataqtigiit Tunngaviusumik Inatsisissaq pillugu Isumalioqatigiissitap pilersinneqarniarnerani oqaatigaarput. Taamaattumillu Naalakkersuisut aajalangersimanerat qanoq tunngaveqarnerasoq paaserusuppara. Maanna aamma paasinarsimmat Naalakkersuisut Tunngaviusumik Inatsisissaq pillugu Isumalioqatigiissitami ilaasortat akissaasersorneqarnissaanut ikinnerussuteqalersut. Tamanna pillugu apeqqutit nassiuppakka.

Kissaatigaara apeqqutit ullut qulit qaangiutsinnagit akineqarnissaat.